

四庫全書

子部

欽定四庫全書

子部  
玉海卷一百四十

詳校官中書臣張經田

主事臣祁韻士覆勘

總校官進士臣朱 鈐

校對官編修臣朱 攸

謄錄監生臣魏綿曾

欽定四庫全書

玉海卷一百四十

宋 王應麟 撰

兵制

兵法

刑法志凡兵所以存亡繼絕救亂除害也

神農兵法

漢藝文志兵陰陽家太乙兵法一篇天一兵法三十五

篇神農兵法一篇 晁錯傳神農之教曰石城湯池亡粟弗能守

黃帝李法

漢胡建傳建為軍正丞時監軍御史穿北軍壘垣以為賈區建斬之上奏曰黃帝李法曰壁壘已定穿窬不繇路是謂姦人姦人者殺注蘇林曰獄官名也顏師古曰李者法官之號總主征伐刑獄之事故稱其書為李法天文志左角李右角將注師古曰李者法官之

號總主征伐刑獄故稱其書為李法 藝文志兵陰

陽家黃帝十六篇圖三卷風后十三篇圖二卷黃

帝臣依托也

管子后土為李

冬李也

說苑黃帝

理法

黃帝兵法 兵歷

漢藝文志兵陰陽家黃帝十六篇圖三卷風后十三篇

圖二卷 太平御覽引黃帝元女兵法曰禹問於風后

曰吾聞黃帝有屈勝之圖六甲陰陽之道對曰藏會稽

之山禹開視之中有天下經十二卷禹得中四卷 武  
經總要太乙者天帝之神也其星在天之南總十六神  
知風雨水旱金革凶饑陰陽二局存諸祕式星文之次  
舍分野之災祥貴乎先知逆為之備用軍行師主客勝  
負蓋天人之際相參焉

黃帝握奇文 風后握機

書曰風后握機一卷風后黃帝臣也晉馬隆畧序卷首  
言圖有三其一三百六十字其一二百八十字呂望所

增其一行間有公孫弘等語或云武帝令霍光等習之  
於平樂觀以輔少主備天下之不虞今本載所增字亦  
有公孫弘語 薛氏詮定云握竒經別有續圖記金革  
旗麾進退趨闕之法 李靖問對黃帝兵法世傳握竒  
文嚴從依風后大旨圖以擬方陣隋志黃帝蚩尤風后  
行軍秘術二卷後漢張衡注春秋內事曰黃帝師於風  
后風后善於伏羲氏之道故推演陰陽之事 武經總  
要大撓造甲子推天地之數風后演遁甲究鬼神之奧

漢高紀祠黃帝祭蚩尤於沛庭注應劭曰蚩尤古天子好五兵瓚曰蚩尤庶人之貪者管子五行篇黃帝得蚩尤而明於天道則黃帝六相亦有蚩尤

李筌太白陰經曰風后演握奇圖復置虛實二壘力牧亦創營圖抱朴子黃帝精推步則訪山稽力牧講占候則詢風后

黃帝刑德

尉繚子梁惠王問曰黃帝刑德可以百勝有之乎對曰



刑以伐之德以守之非所謂天官時日陰陽向背也人  
事而已矣 淮南子兵畧注刑十二辰德十日也天文  
訓凡用太陰左前刑右背德擊鈎陳之衝辰以戰必勝  
以攻必尅

黃帝兵法訣

唐志黃帝兵法訣一卷 隋志黃帝兵法難要訣一卷  
黃帝蚩尤風后行軍祕術二卷

黃帝出軍訣

文選注黃帝出軍訣始立牙之曰吉氣未應旗幡指敵  
或從風雨來金鐸之聲揚以清鼓鞞之聲婉而鳴是謂  
堂堂之陣整整之旗此六韜也蓋言取天下及軍旅之  
事 武經七書太公六韜文韜一武韜二龍韜三虎韜  
四豹韜五犬韜六 莊子商曰從說之則以金板六  
弋注周書篇名 隋志太公六韜五卷 梁六卷 晁氏志兵  
家權謀之書也元豐中以六韜孫子吳子司馬法黃石  
公三畧尉繚子李衛公對問頒行武學令習之號曰七

書云按兵法漢成帝嘗命任宏分權謀形勢陰陽技巧為四種今乃有卜筮政刑之說在四種之外矣 文選

注引七畧曰太公金版玉匱雖近世之文然多善者又引

太公金匱

太史公序齊世家謬權于幽正義謂六韜三畧

陰符七術之屬

黃帝太公兵法

見陣法類

周軍法 九灋

地官縣師若將有軍旅會同田役之戒則受灋于司馬以作其衆庶及馬牛車輦會其軍人之卒伍使皆備旗鼓兵器以帥而至 遂人稽其人民而授之田野簡其兵器注遂之軍法追胥起徒役如六鄉疏天子六鄉六遂合有十二軍而止六軍何也蓋六鄉為正六遂為副倅至於大國之三鄉三遂次國之二鄉二遂小國之一鄉一遂莫不皆然但以王家迭用之則常六軍爾故止言六軍此鄉遂制軍之法 夏官諸子若有甲兵之事

則授之車甲合其卒伍置其有司以軍灋治之司馬弗  
正注軍法百人為卒五人為伍大司馬掌建邦國之  
九法以佐王平邦國以九伐之法正邦國馮弱犯寡則嘗  
之賊賢害民則伐之暴內陵外則壇之野荒民散則削  
之負固不服則侵之賊殺其親則正之放弑其君則殘  
之犯令陵政則社之外內亂鳥獸行則滅之注諸侯有  
違王命則出兵以征伐之所以征之也諸侯之于國如  
樹木之有根本是以言伐云

文王征伐法

原闕

武王兵書

周禮注

春官  
大師

兵書曰大師吹律合音商則戰勝軍士強

角則軍擾多變失士心宮則軍和士卒同心徵則將急  
數怒軍士勞羽則兵弱少威明疏兵書者武王出兵之  
書

太公兵法

太公兵鈐法

陰謀

隋志太公兵法二卷

梁三卷

又六卷

梁有太公雜兵書六卷

陰謀二

卷

梁六卷

陰符鈐錄一卷金匱二卷伏符陰陽謀一卷三

宮兵法一卷周書陰符九卷周呂書一卷

漢藝文志

太公謀八十一篇言七十一篇兵八十五篇

李靖曰

謀所謂陰謀不可以言窮言不可以兵窮兵不可以財

窮此三門也

漢張良傳老父出一編書視其書乃太

公兵法

戰國策鬼谷得陰符之謀伏而誦之蘇秦得

太公陰符之謀

隋志有太公陰謀

呂尚七術

史記正義六韜三畧陰符七術之屬 鬼谷子有陰符  
七術有揣及摩二篇

漢刑法志凡兵所以存亡繼絕救亂除害也故伊呂之  
將子孫有國與商周並 蘇氏曰世之論伊氏太公多  
以陰謀竒計歸之其說乃與漢陳平魏賈誦無異夫陳  
平賈誦之事張子房荀文若之所不為而謂伊尹太公  
為之乎 董氏曰墨翟以太公於文王為忤合而孫武



謂之用間且以嘗焉文武將兵故尚權詐者多並緣自見吾意六韜所傳雜出春秋戰國以來兵家漢魏間好事者始擬為而名之 通典周初太公曰教戰之法必明吏士申三五之令教其操兵起居進止旌旗指麾陣而方之坐而起之行而止之左而右之列而合之絕而解之無犯進止之節無失飲食之宜無絕人馬之力令吏士一人學戰教成十人十人學戰教成百人百人學戰教成千人千人學戰教成萬人萬人學戰教成三軍

之衆大戰之法百萬之師故能成大功也

六強

漢藝文志儒五十三家八百三十六篇周史六篇注闕

不明敵人之政不能加也未可加兵不明敵人之情不能約

也未可約誓不明敵人之將不先軍不明敵人之士不先陣

故以衆擊寡以治擊亂以富擊貧以能擊不能以教卒

練士擊敵衆白徒故百戰百勝也又曰善攻者料衆以

攻衆量吾衆寡彼衆寡然後攻料食以攻食料備以攻備以衆攻衆

衆存不攻

彼衆存則我不能亡之也故不攻

以食攻食食存不攻以備

攻備備存不攻釋實而攻虛

知其貴宜避之

釋堅而攻耗釋難

而攻易夫國搏不在敦古

在於合今時宜

治世不在善政

在於權宜

霸王不在曲成

在於全大體也

### 伍子胥兵法

漢藝文志兵書伍子胥十篇圖一卷

唐志伍子胥兵

法一卷

武經總要伍子胥對闔閭以船軍之教

闕

大選注引越絕書伍子胥水戰兵

范蠡兵法

漢藝文志兵權謀范蠡二篇 甘延壽傳注張晏引范

蠡兵法飛石重十二斤為機發行三百步 春秋

闕

為發石一曰飛石引范蠡兵法作飛

闕

引飛石重二十  
十發行三十 東萊呂氏曰越語下

闕

詞多與管子勢篇相出入 韓文曹成王碑王親教

之搏力勾卒羸越之法注羸謂秦也越謂句踐伐吳之

兵法也

老子兵書

隋志一卷老子曰用兵者言吾不敢為主而為客不敢  
進寸而退尺是謂行無行攘無臂仍無敵執無兵禍莫  
大於輕敵輕敵幾喪吾寶故抗兵相加哀者勝矣又曰  
以正治國以奇用兵又曰將欲喻之必固張之將欲弱  
之必固強之將欲廢之必固興之將欲奪之必固與之  
國之利器不可以示人

魏公子兵法

史記魏公子無忌安釐王三十年公子率五國之兵破秦軍於河外走蒙驁遂乘勝逐秦軍至函谷關抑秦兵秦兵不出公子威振天下諸侯之客進兵法公子皆名之故世俗稱魏公子兵法注劉歆七畧有魏公子兵法二十一篇圖七卷 漢志兵形執魏公子二十一篇圖十卷

楚軍志

左傳宣十二年

見陣法類

荀子六術 五權 三至

荀子嘗與臨武君論兵於趙孝成王前王曰請問兵要  
曰兵要在附民夫仁人之兵百將一心三軍同力臣之  
於君也下之於上也若子弟之事父兄若手臂之扞頭  
目而覆胷腹也故兵要在於附民而已齊人隆技擊得  
一首者賜贖鎊金無本賞矣事小敵毳則偷可用也事  
大敵堅則渙然離耳是亡國之兵也其去貨市傭而戰  
之幾矣魏氏之武卒以度取之衣三屬之甲操十二石

之弩負矢五十置戈其上冠冑帶劔羸三日糧日中而趨百里中試則復其戶利其田宅氣力數年而衰而未可奪也改造則不易周也故地雖大其稅必寡是危國之兵也秦人其生民也陋隘其使民也酷烈忸之以慶賞黜之以刑罰使民所以要利於上者非闕無由也使以功賞相長五甲首而隸五家是最為衆彊長久之道然皆干賞蹈利之兵未有安制綦節之理也故齊之技擊不可以遇魏之武卒魏之武卒不可以遇秦之銳士



秦之銳士不可以當桓文之節制桓文之節制不可以敵湯武之仁義故招延募選隆勢詐尚功利是漸之也禮義教化是齊之也故兵大齊則制天下小齊則治隣敵若夫招延募選隆勢詐尚功利之兵則勝不勝无常相為雌雄耳夫是之謂盜兵君子不由也王曰善請問為將對曰號令欲嚴以威賞罰欲必以信處舍收藏欲周以固徙舉進退欲安以重欲疾以速窺敵觀變欲潛以深欲伍以參遇敵決戰必行吾所明无行吾所疑夫

是之謂六術无欲將而惡廢无怠勝而忘敗无威内而輕外无見利而不顧其害凡慮事欲熟而用財欲泰夫是謂五權可殺而不可使處不完可殺而不可使擊不勝可殺而不可使欺百姓夫是之謂三至凡百事之成也必在敬之其敗也必在慢之故敬勝怠則吉怠勝敬則滅計勝欲則從欲勝計則凶戰如守行如戰有功如幸慎行此六術五權三至而處之以恭敬无曠夫是之謂天下之將臨武君曰善請問王者之軍制對曰將死

鼓御死轡百吏死職士大夫死行列聞鼓聲而進金聲而退順命為上有功次之不殺老弱不獵田稼服者不禽格者不赦犇命者不獲凡誅非誅百姓也誅其亂百姓者也百姓有捍其賊者是亦賊也故順刃者生僚刃者死犇命者貢有誅而无戰不屠城不潛軍不留衆師不越時故亂者樂其政不安其上者欲其至也臨武君曰善陳囂問曰先生議兵常以仁義為本然則又何以兵為哉孫卿曰仁者愛人故惡人之害之也義者循理

故惡人之亂之也故兵者所以禁暴除害也非爭奪也

司馬穰苴兵法

史記齊威王用兵行威大放穰苴之法而諸侯朝齊威王使大夫追論古者司馬兵法而附穰苴於其中號曰司馬穰苴兵法太史公曰余讀司馬兵法閎廓深遠雖三代征伐未能竟其義如其文也亦少褒矣若夫穰苴區區為小國行師何暇及司馬兵法之揖讓乎世既多司馬兵法以故不論著穰苴之列傳焉 隋志司馬兵

法三卷穰苴撰 穰苴曰將受命之日則忘其家臨軍  
約束則忘其親授桴鼓之急則忘其身

尉繚子兵書

漢藝文志兵形執尉繚子三十一篇雜家尉繚二十九

篇六國時

劉向別錄云  
繚為商君學

隋志五卷唐六卷 晁氏志書

論兵主刑法漢志二十九篇今逸五篇首篇稱梁惠王  
問意者魏人歟其卒章有曰古之善用兵者能殺卒之  
半其次殺十三其下殺其十一能殺其半者威加海內

殺十三者力加諸侯殺十一者令行士卒觀此則為術  
可知矣張橫渠注尉繚子一卷載蚤年喜談兵後謁范  
文正公愛其材勸其學此少作也

孫子兵法

漢藝文志兵權謀吳孫子兵法八十二篇圖九卷 史  
記孫武傳闔廬曰子之十三篇吾盡觀之矣孫臏亦孫  
武之後世子孫也與龐涓俱學兵法名顯天下世傳其  
兵法太史公曰世俗稱師旅皆道孫子十三篇吳起兵

法世多有故弗論正義七錄云孫子兵法三卷十三篇  
為上卷又有中下二卷 魏武帝注孫子止十三篇始  
計至用間杜牧以為武書數十萬言魏武削其繁剩筆  
其精粹成此書其序畧曰吾讀兵書戰策多矣武所著  
深矣 歐陽氏曰孫武嘗以書干吳王闔廬用之西破楚  
北服齊晉而霸諸侯夫使武自用其書止於強伯及曹  
公用之然亦終不能滅吳蜀豈武之術盡於此乎抑用  
之不極其能也 唐李荃以魏武所解多誤約歷代史

依適甲註成三卷

杜牧以武書大畧用仁義使機權

曹公所註解十不釋一蓋借其所得自為新書爾牧因

備註之

陳暉以曹註隱微杜註闕疎重註

紀燮集

孟氏賈林杜休三家所解

宋梅堯臣王皙何氏註

晁氏志吳起言法家機權法制之說唐陸希聲類次為

之說料敵治兵論將變動勵士凡六篇

蘇氏老泉曰

武用兵不能必克與書所言遠甚吳起與武一體之人

皆著書言兵世稱之曰孫吳然而起之言兵也輕法制



草畧無所統紀不若武之書詞約而義盡然起始用於魯破齊及入魏又能制秦入楚楚復伯而武之所為乃如是書之不足信固矣 樊川序註曰自古以兵著書到於後世可以教於後生者凡十數家且數萬言其孫武所著十三篇自武死後凡千歲將兵者有成者有敗者勛其事跡皆與武所著書一一相抵當猶印圈模刻一不差跌武之所論大約用仁義使機權也 東坡蘇氏曰古之言兵者無出於孫子矣利害之相權奇正之

相生戰守攻圍之法蓋以百數雖欲加之而不知所以加之矣然其所短者智有餘而未知其所以用智此豈非其所大闕歟夫兵無常形而逆為之形勝無常處而多為之地是以其說屢變而不同縱橫委曲期於避害而就利雜然舉之而聽用者之自擇也是故不難於用而難於擇擇之為難者何也銳於西而忘於東見其利而不見其所窮得其一說而不知其又有一說也此豈非用智之難歟 蘇氏曰嘗讀周官司馬法得軍旅

什伍之數其後讀管夷吾書又得管子所以變周之制蓋王者之兵出於不得已而非以求勝敵也故其為法要以不可敗而已至於桓文非決勝無以定霸故其法在必勝繁而曲者所以為不可敗也簡而直者所以為必勝也周之制萬二千五百人為軍萬之有二千二千之有五百其數奇而不齊唯其奇而不齊是以知其所以為繁且曲也今夫天度三百六十均之十二辰得三十者此其正者也五

日四分之一者此其奇也使天度而無奇則千載之日  
雖婦人孺子皆可以坐而計唯其奇而不齊是故巧歷  
有所不能盡也聖人知其然故為之章會統元以盡其  
數以極其變 司馬法曰五人為伍十伍為隊萬二千五  
百人為隊二百五十十取三馬而為奇其餘七以為正  
四奇四正而八陣生焉夫以萬二千五百人而均之八  
陣之中宜其有奇而不齊是以多為之曲折以盡其數  
以極其變鈎聯蟠屈各有條理故三代之興治其兵農

軍賦皆數十百年而得志於天下自周之亡秦漢陣法不復三代其後諸葛孔明獨識其遺制以為可用以取天下然相持數歲魏人不敢決戰而孔明亦卒無尺寸之功豈八陣者先王所以為不可敗而非以逐利爭勝者邪若夫管仲之制其兵可謂截然而易曉矣三分其國以為三軍五人為軌軌有長十軌為里里有司四里為連連有長十連為鄉鄉有鄉長五鄉一師萬人為一軍公將其一高子國子將其二三軍三萬人如貫繩如

畫棋局疎暢洞達雖有智者無所以施其巧故其法令簡一而民有餘力以致其死昔者嘗讀左氏春秋以為丘明最好兵法蓋三代之制至於列國猶有存者以區區之鄭而魚麗鷲鶴之陣見於其書及至管仲相桓公南伐楚北伐孤竹九合諸侯威震天下而其軍壘陣法不少概見者何哉蓋管仲欲以歲月服天下故變古司馬法而為是簡畧速勝之兵是以莫得而見其法也其後吳晉爭長於黃池王孫雄教夫差以三萬人壓晉壘

而陣百人為行百行為陣陣皆徹行無有隱蔽援桴而鼓之勇怯盡應三軍皆譁晉師大駭卒以得志由此觀之不簡而直不可以決勝深惟後世不達繁簡之宜以取敗北而三代什伍之數與管子所以治齊之兵者雖不可盡用而其近於繁而曲者以之固守近於簡而直者以之決戰則庶乎其不可敗而有所必勝矣

孫臏兵法

漢志齊孫子八十九篇圖四卷 呂氏春秋孫臏貴勢

司馬遷傳孫子臆脚兵法修列 通典引孫臆曰用

騎有十利一曰迎敵始至二曰乘敵虛背三曰追散亂  
擊四曰迎敵擊後使敵奔走五曰遮其糧食絕其軍道  
六曰敗其津關發其橋梁七曰掩其不備卒擊其未整  
旅八曰攻其懈怠出其不意九曰燒其積聚虛其市里  
十曰掠其田野係累其子弟此十者騎戰利也夫騎者  
能離能合能散能集百里為期千里而赴出入無間故  
名離合之兵也



吳起兵法

漢志吳起四十八篇 隋志吳起一卷今本三卷六篇

圖國至  
勵士

通典引吳起教戰法短者持矛戰長者持

弓弩強者持旌旗勇者持金鼓弱者給廝養智者為  
謀士鄉里相比什伍相保一鼓整兵二鼓習陣三鼓趣  
食四鼓嚴辦五鼓就行聞鼓聲合然後舉旗又引魏武  
侯問吳起曰兵以何勝曰治為勝不在衆乎起曰法令  
不明賞罰不信聞鼓不進聞金不止雖有百萬之師何

益於用所謂治者居則有禮動則有威進不可當退不可追前却如節左右應麾雖絕成陣雖散成行投之無所往天下莫當又曰凡敵有不卜而與戰不占而避之疾風大寒早興冥遷剖冰濟水盛夏炎熱興役無間行驅饑渴務於取遠師久無糧士衆怨怒妖祥數起上不能止軍資既竭天多陰雨欲掠無所師衆不多水地不利人馬疾疫道遠日暮士卒勞倦飢未及食解甲而息將薄吏輕士卒不固三軍數驚師徒無助陣而未定舍

而未畢行坂涉險半隱半見凡如此者擊之勿疑若土地廣大人民富衆上愛其下惠施流布賞信刑察發必得時行陣居列任賢使能師徒之衆兵甲之精四隣之助大國之援凡如此類憚而避之故曰見可而進知難而退 唐氏曰司馬法在六藝兵法如孫吳皆後世變詐之兵非古之兵書也雖陰陽神農黃帝之號皆託也

### 管子兵法

李靖問對管子制齊之法云云亦由司馬法一師五旅一

旅五卒之義焉其實皆得太公之遺法管子曰夫為

兵之數存乎聚財論工

造軍器

制器

兵器

選士政教

軍中號令

服

習

謂使習武藝

徧知天下

謂徧知其地形險易主將工拙士卒勇怯

明於機數此

八者皆須無敵故兵未出境而無敵者八悉備然後能

正天下又曰凡人之所以守戰至死而不德其上者

或守

或戰雖復至死不敢恃之以德於上則有數存焉於其間故至於此也

曰大者親戚墳墓

之所在也

一變

田宅富厚足居也

二變

不然則州黨與宗族

足懷樂也

三變

不然則上之教訓習俗慈愛之於民也厚

無所往得之也

君之恩厚皆在於民無所他往故得民致死四變也

不然則山林

澤谷之利足生也

五

不然地形險阻易守而難攻也

六

不然則罰嚴而可畏也賞明而足勸也

七

不然則有深

怨於敵人也

八

不然則有厚功於上也

功厚則祿多故亦自為戰而德

於君九變

今恃不信之人而求以利用不守之民而欲以固

將不戰之卒而幸以勝此兵之三間

又曰天時地利

其數多少其要必出於計數故凡攻伐之為道也計必

定於內然後兵出乎境計未定而出兵是則戰之自勝

攻之自毀也故明敵人百勝之徵也

黃石公三畧 黃石公記

後漢臧宮傳詔報曰黃石公記乘能制剛弱能制強注  
即張良於下邳圯所見老人出一編書者 隋志黃石

公內記敵法一卷三畧三卷下邳神人撰成氏注梁有

黃石公記三卷黃石公畧注三卷黃石公三奇法一卷

五壘圖一卷陰謀行軍秘法一卷兵書三卷梁有黃石

公秘經二卷唐志黃石公三畧三卷又陰謀乘斗魁剛

行軍秘一卷成氏三畧訓三卷張良經一卷張氏七篇

七卷

張良

太平御覽引黃石公陰謀秘訣法

黃石公素書

張良傳游下邳圯上有一老父墮其履圯下顧曰孺子  
下取履良因跪進父曰孺子可教矣後五日平明與我  
會此凡三往乃出一編書曰讀是則為王者師矣旦日  
視其書乃太公兵法也良常讀誦之 史記張子房從  
高祖過濟北見黃石

所受書

取而寶之至伏日祠焉

書目黃石公素書一卷凡六章

恐依託

晁氏志黃石公

三畧經籍志云下邳神人撰世傳此即圯上老人以一編書授張良者

### 漢軍法

高紀天下既定命韓信申軍法 藝文志漢興張良韓信序次兵法 胡建傳為軍正丞上奏曰臣聞軍法立武以威衆誅惡以禁邪今監御史公穿軍垣以求賈利私買賣以與士市黃帝李法壁壘已定穿窬不繇路是



謂姦人姦人者殺臣謹案軍法曰正亡屬將軍將軍有罪已聞二千石以下行法焉丞於用法疑執事不諉上臣謹以斬制曰司馬法曰國容不入軍軍容不入國何文吏也三王或誓於軍中欲民先誠其慮也或誓於軍門之外欲民先意以待事也或將交刃而誓致民志也建又何疑焉 朱虛侯章請以軍法行酒 繡衣御史暴勝之持斧逐捕盜賊以軍興漢事誅二千石以下唐蒙通夜郎用軍興法誅其渠率 趙護為廣漢太守

以軍法從事

漢軍禮司馬法

藝文志軍禮司馬法百五十五篇出兵家入禮家司  
馬法註司馬之職所專者武事也治軍用兵皆用法也  
據縣師之職曰若將有軍旅會同田役之戒則受法於  
司馬以作其衆庶說者謂司馬主將軍故先於司馬處  
受出軍多少及法式得法乃作起衆庶此後人之所以  
稱司馬法也漢武帝引司馬法曰登車不式劉向引曰

賞不踰月周禮注引曰十人之長執鉦百人之師執鐸千人之師執鞀萬人之主執大鼓杜佑引曰上謀下鬪圍其三面開其一面之類皆謂古司馬法也然其文不見今五篇中漢志有百五十篇今存五篇而已李靖問對太宗曰人言司馬法穰苴所述是否靖曰齊景公時穰苴善用兵敗燕晉之師公尊為司馬之官由是子孫號司馬氏至齊威王追論古司馬法又法穰苴所學遂有司馬穰苴數十篇今世所傳兵家流又分權謀形

勢陰陽技巧四種皆出司馬法也

漢定著三十五家兵法 兵錄 兵書四種

藝文志兵家者蓋出古司馬之職王官之武備也 漢

興張良韓信序次兵法凡百八十二家刑取要用定著

三十五家諸呂用事而盜取之武帝時軍正楊僕摺

遺逸紀奏兵錄猶未能備至于孝成命任宏論次兵書

為四種權謀形勢陰陽技巧 高紀命韓信申軍法

兵權

謀有轉  
信三篇

李靖問對張良所學六韜三畧是也韓信所學

穰苴孫武是也然大體不出三門四種而已 秦觀曰  
此四術者以道用之則為四勝不以道用之則為四敗  
事同而功異不可不察也昔孫臏伏萬弩馬陵之下魏  
軍至而伏發龐涓死焉王恢伏車騎材官三十萬於馬  
邑之旁匈奴覺之而去恢以自殺此則用權謀之異也  
馬服君救闕與既遣秦間卷甲而趨之二日一夜遂破  
秦軍曹公追劉先主一日一夜行三百里敗於烏林此  
則用形勢之異也西伯將獵卜之曰獲霸王之輔果得

太公望而克商漢武卜諸將貳師最吉因以為將卒降  
匈奴此則用陰陽之異也申公巫臣教吳以車戰吳以  
是通上國房瑄用車以抗祿山賊投芻而火之王師奔  
潰此則用巧之異也豈非以道用之則勝不以道則敗  
乎雖然所謂道者治心養氣而已矣

漢五十三家兵書

藝文志兵權謀十三家兵形執十一家陰陽十六家兵  
技巧十三家凡兵書五十三家七百九十篇圖四十三

卷

史記魏伐趙趙急請救於齊齊以田忌為將而孫子為

師田忌欲引兵之趙孫子曰夫解雜亂紛糾者不控捲

解事之雜亂紛糾者當善以手解之不可控捲而擊之捲即拳也救鬪者不搏搥音搏

救鬪者當善搥解之無以手助相搏搥則其怒益熾矣搏搥謂以手持戟刺人也批亢擣虛批

結反亢苦浪反批者相排批也言敵人相亢拒也擣者擊也動也虛者空也謂前人相亢必須批之彼兵空虛

則衝擊之欲令形格勢禁則自為解耳若批其相亢擊擣彼虛則是事

形相格而其孰自禁今梁趙相攻輕車銳卒必竭於外止則彼自為解兵也

欽定四庫全書

玉海 卷一百四十

二十七

老弱罷於內不若引兵疾走大梁據其街路衝其方虛  
彼必釋趙而自救是我一舉解趙之圍而收弊於魏也  
田忌從之云云魏趙攻韓齊救之孫子謂田忌曰彼三晉  
之兵素悍勇而輕齊齊號為怯善戰者因其執而利導  
之兵法百里而趣者蹶上將五十里而趣利者軍半至  
使齊軍入魏地為十萬竈明日為五萬竈又明日為二  
萬竈云云

漢兵家圖



藝文志權謀吳孫子圖九卷齊孫子圖四卷形勢圖十  
八卷楚兵法四卷孫軫二卷王孫五卷魏公子十卷陰  
陽圖十卷黃帝三卷風后二卷鳩冶子一卷鬼容區一  
卷別成子望軍氣三卷技巧鮑子兵法圖一卷伍子胥  
一卷苗子圖一卷凡兵書五十三家圖四十三卷 鄭  
氏曰圖經也書緯也一經一緯相錯而成文圖植物也  
書動物也一動一植相須而成變化蕭何入咸陽先取  
秦圖書劉氏七畧收書不收圖惟任宏校兵書四種有

書五十三家有圖四十三卷

漢兵體三章

晁錯傳言兵事曰臣聞用兵臨戰合刃之急者三一日  
得地形二曰卒服習三曰器用利兵法曰丈五之溝漸  
車之水山林積石經川丘阜草木所在此步兵之地也  
車騎二不當一土山丘陵曼衍相屬平原廣野此車騎  
之地也步兵十不當一平陵相遠川谷居間仰高臨下  
此弓弩之地也短兵百不當一兩陳相近平地淺草可

前可後此長戟之地劔楯三不當一萑葦竹蕭草木蒙

龍支葉茂接此矛鋌之地也長戟二不當一曲道相伏

險阨相薄此劔楯之地也弓弩三不當一

以上得地形

士不

選練卒不服習起居不精動靜不集趨利弗及避難不

畢前擊後解與金鼓之音相失此不習勤卒之過也百

不當十

以上卒服習

兵不完利與空手同甲不堅密與袒裼同弩不

可以及遠與短兵同射不能中與亡矢同中不能入與

亡鏃同此將不省兵之過也五不當一

以上言器用利

故兵法

曰器械不利以其卒予敵也卒不可用以其將予敵也將不知兵以其主予敵也君不擇將以其國予敵也四者兵之至要也臣又聞小大異形強弱異勢險易異備夫卑身以事強小國之形也合小以攻大敵國之形也以蠻夷攻蠻夷中國之形也今匈奴地形技藝與中國異上下山坂出入溪澗中國之馬弗與也險道傾仄且馳且射中國之騎弗與也風雨罷勞飢渴不困中國之人弗與也此匈奴之長技也若夫平原易地輕車突騎

則匈奴之衆易撓也勁弩長戟射疏及遠則匈奴之弓  
弗能格也堅甲利刃長短相雜遊弩往來什伍俱前則  
匈奴之兵弗能當也材官騶發矢道同的則匈奴之革  
笥木薦弗能支也下馬地闢劔戟相接去就相薄則匈  
奴之足弗能給也此中國之長技也以此觀之匈奴之  
長技三中國之長技五陛下又興數十萬之衆以誅  
數萬之匈奴衆寡之計以十擊一之術也雖然兵凶器  
戰危事也以大為小以強為弱在俛仰之間耳夫以人

之死爭勝跌而不振則悔之無及也帝王之道出於萬全今降胡義渠蠻夷之屬來歸誼者其衆數千飲食長技與匈奴同可賜之堅甲絮衣勁弓利矢

此所謂以蠻夷攻蠻夷

益以邊郡之良騎令明將能知其習俗和睦其心者以陛下之明約將之即有險阻以此當之平地通道則以輕車材官制之兩軍相為表裏各用其長技衡加之以衆此萬全之術也文帝嘉之賜璽書寵荅曰上書言兵體三章聞之

漢金城方畧圖

趙充國傳元康二年先零與諸羌種豪解仇交質充國  
曰宜遣使者行邊兵兩府白遣義渠安國安國至召先  
零諸豪三十餘人斬之諸降羌恐怒劫畧小種背畔犯  
塞是歲神爵元年春也上問誰可將者充國曰無踰老  
臣兵難踰度願馳至金城圖上方畧充國至金城以遠  
斥候為務行必為戰備止必堅營壁持重愛士卒先計  
後戰上賜書以十二月擊先零充國度先零必壞欲罷

騎兵屯田以待其敵作奏未上會得進兵璽書遂上屯  
田奏云又上狀條不出兵留田便宜十二事丞相魏相  
曰臣愚不習兵事利害後將軍數畫軍冊其言常是臣  
任其計可用也上報充國曰將軍計善其上留屯田及  
當罷者人馬數

漢匈奴占

漢兵策

闕



漢諸葛亮將苑 兵要

蜀志諸葛氏集目錄三十四篇兵要一篇軍令上中下

中興書目將苑一卷凡五十篇論為將之道 隋志

諸葛亮兵法五卷 崇文目兵機法五卷 通典諸葛

亮兵法曰山陵之戰不仰其高水上之戰不逆其

流草上之戰不涉其深平地之戰不逆其虛此兵


之利也故戰鬪之利唯氣與形也 蘇氏曰諸葛亮與

魏角戰曰知有所甚愛知有所不足愛可以用兵矣故

夫善將者以其所不足愛者養其所甚愛者士之不能  
皆銳馬之不能皆良器械之不能皆利固也處之而已  
矣兵之有上中下也是兵之有三權也孫臏有言曰以  
君下駟與彼上駟取君上駟與彼中駟取君中駟與彼  
下駟此兵說也非馬說也下之不足以與其上也吾既  
知之矣吾既棄之矣中之不足以與吾上下之不足以  
與吾中吾不既再勝矣乎得之多於棄也吾斯從之矣  
彼其上之有三權也三權也者以一而致三者也管仲

曰攻堅則瑕者堅攻瑕則堅者瑕嗚呼不從其瑕而攻之天下皆強敵也漢高帝之憂在項籍耳云云子西論亮為後主寫申韓管子六韜曰學者責孔明不以經術輔導少主乃用六韜管子申韓之書吾謂不然人君不問撥亂守文要以智畧為先後主寬厚仁義衿量有餘而權畧智謀是其所短當時識者咸以為憂六韜述兵權奇計管子貴輕重慎權衡申子覈名實韓子引繩墨切事情施之後主正中其病矣藥無善惡要以對病為妙

萬金良藥與疾不相值亦復何補哉



玉海卷一百四十

欽定四庫全書

子部

玉海卷一百四十一

詳校官中書臣張經田

主事臣祁韻士覆勘

總校官進士臣朱

朱

鈐

校對官編修臣

朱

攸

謄錄監生臣

魏

綿曾

欽定四庫全書

玉海卷一百四十一

宋 王應麟 撰

兵制

兵法

魏武帝新書

魏志太祖自統御海內芟夷羣醜其行軍用師大較依  
孫吳之法而因事設奇請敵制勝變化如神自作兵書

十餘萬言諸將征伐皆以新書從事從令者克捷違教

者負敗抄集諸家兵法名曰接要

又注孫子十三篇

隋志兵書

接要十卷

唐志七卷

兵法接要三卷魏武帝兵法一卷

李

靖問對引曹公新書

### 魏兵書要畧

唐志魏文帝兵書要畧十卷

太平御覽引之

隋志兵書畧要九

卷魏武帝撰

梁有兵要二卷

兵書要畧五卷後周宇文憲撰梁

武帝兵書要鈔一卷

唐志宋高祖兵法要畧一卷梁

武帝兵法一卷

魏兵書

魏志王昶著兵書十餘篇言竒正之用青龍中奏之

晉兵林

隋志兵林一卷東晉孔衍撰

齊漢武北伐圖

闕

梁玉韜

隋志梁元帝玉韜十卷 劉祐隋開皇中奉詔撰兵書



十卷名曰金韜

唐志同

唐二十三家兵家

藝文志丙部子錄十二曰兵書類二十三家六十部三百十九卷始於黃帝問玄女法終於李淳風縣鏡失姓名十四家不著錄二十五家一百六十三卷李筌注孫子以下終於張道古兵論 隋志一百三十三部司馬法至象經

唐兵法三等

見陣法類

唐兵家正史

志吳兢兵家正史九卷

唐四十六訣

裴行儉傳為營陣步伍勝負等為四十六訣

唐六軍鏡

書目六軍鏡三卷李靖撰各五章以天子六軍故取為名起政理終尅敵

唐諸葛亮奇正法

詳見陣法

李靖問對靖曰臣前進黃帝太公二陣圖并司馬法諸  
葛亮奇正之法此已精悉

唐玉帳經 李衛公問對

志兵書五行類李靖玉帳經一卷李筌六壬玉帳歌十

卷

抱朴子外篇軍在太乙玉帳之中不可攻也

崇文目彭門玉帳一卷書目

李靖兵鈴新書一卷載靖與秦王論兵如問對書 晁

氏志李靖對太宗問兵事史臣謂李靖兵法世無完書

畧見於通典今對問出於阮逸家或云逸因附益之

唐闡外春秋

書目闡外春秋十卷李筌撰起周武王至唐武德凡八  
代錄明君良將用兵得失以事繫年擬左丘明而為之  
褒貶

唐太白陰經

志李筌太白陰經十卷 書日記出師用兵之事凡一  
百篇太白主兵故以為名

唐臨戎孝經

志兵書員半千臨戎孝經二卷小說郭良輔武孝經一卷兵書論語三卷

唐天寶軍防錄

鄭虔傳長於地理山川險易方隅物產兵戍衆寡無不

詳當為天寶軍防錄 志兵書類卷七

崇文目  
一卷

唐定遠安邊策

志郭元振定遠安邊策三卷 書目安邊策三卷郭元

振撰凡三篇 晁氏志元振以總兵進攻聚衆退守不可無權謀乃著此書故舊題曰定遠安邊策

唐統軍靈轄秘策 武紀

志李光弼統軍靈轄秘策一卷

一作武記

書目一名武紀

述用兵為將之畧凡一百二條

讀書志曰其書凡五十章

唐禦戎新錄

志兵書類李渤禦戎新錄二十卷

會要元和九年四

月右拾遺李渤撰

舊書元和初召為左拾遺家東都

朝廷政有得失附章疏陳論又撰禦戎新錄二十卷表  
獻之

唐西南備邊錄

見錄類

志李德裕西南備邊錄十三卷 在文宗朝吐蕃間釁

河隴失險締從南詔協以謀我并絡坤維我棘守臣章

臯鑿青溪道要結蠻好倚鹿效順纂集事狀為卷十七

質幣結轍閩戶誨盜爰命德裕改紀其政乃建籌邊之

樓凡險要與蠻相入者圖之左與戎密邇者圖之右而

部落饋運靡不察乃立雄邊之軍其精兵曰南燕及連  
弩騎士曰飛星及突騎而農戰器械靡不飾仗義城以  
制大度清溪關之阻作禦侮城以控榮經犄角勢作柔  
遠城以扼西山吐蕃復叩峽關從嵩州治臺登以奪蠻  
險猶慮敵去而備弛也兵將糧械之數城鎮種落之名  
歲計經用之目講求利病輯為一書諸郡固實外夷情  
狀臚分縷析粲如指掌勅立碑壘咸以朱書總繪小圖  
標之首卷而第四卷叙維州本末尤詳書成於太和六



禋迨會昌中秉國之均始奏上之唐藝文志列在兵書  
今館閣書目存者一卷

唐兵要

闕

唐兵書 兵書要訣

志王公亮兵書十八卷長慶元年上 杜希全新集兵  
書要訣三卷張道古兵論一卷

唐裴子新令

志新令二卷

裴緒撰

書目採拾諸家部署習練等法及

五行諸陣形勢凡三十一章

建隆軍律

張方平言太祖訓齊軍法甚嚴軍人不得衣皂但許衣  
褐制不得過膝葱韭不得入軍門又制更戍之法遠妻  
孥外戍之日多人人少家累衣食易足每月請糧營在  
城西者即於城東支不許輒車乘須令自負以勞役之  
故士卒足衣食無外慕安辛苦而易使 范祖禹言祖

宗兵法本於樞密有發兵之權而無握兵之重京師之兵總於三司有握兵之重而無發兵之權彼此相維不專制此所以百三十年無兵變

太平興國軍誠

太平興國八年六月己亥以宣徽南院使樞密副使王顯為樞密使上召謂顯曰卿世非儒家少懼兵患必寡學問今在朕左右典掌萬機因年暇博覽羣書左右取軍誠三篇賜顯曰讀此亦可以免面牆矣

富弼政要釋曰大臣不知學術則關於大體王顯一武人雖以才力任用至樞密使太宗慮其不學不能曉通變之事故以軍戒授之使知賢者行事也 唐藝文志

裴守一軍誠三卷 端拱二年春戶部郎中張洎奏議曰軍志曰凡臨敵法令不明賞罰不信聞鼓不進聞金不止雖有百萬之師何益於用又曰將從中御兵無選鋒者必敗臣頃聞涿州之戰元戎不知將校之能否將校不知三軍之勇怯各不

相管轄以謙謹自任未聞賞一功臣戮一叛命也  
軍志曰弩不及遠與短兵同射不能中與無矢同中不  
能入與無鏃同臣聞涿州之戰敵人未至萬弩齊張虜  
騎既還箭如山積乃知戈戟刀劍其用皆然是驅天兵  
奮空弩而對勍敵也軍志曰三軍耳目在吾旗鼓臣頃  
聞涿州之戰陣場既布或取索兵仗或遷移部隊萬口  
傳叫囂聲沸騰乃至轍亂塵驚莫知攸往昔湯武戡定  
天下桓文攘却四夷項羽之滅彊秦闔閭之摧勁楚隋

楊素削平禍亂悉以鈇鋒而定戎業臣頃聞涿州之戰  
王師霧集聲怛強敵然而矢石未交竒正先亂嗚呼軍  
政如此孰救敗亡尚賴天威遠臨全師以濟陛下懲覆  
車於既往收大功於將來若不揭重賞以圖其勞示嚴  
刑以齊其後置三軍於死地然後為用則不能集大勲  
而摧勁敵矣軍志曰凡出師臨陣一夫不用命則斬一  
夫一校不用命則斬一校一隊不用命則斬一隊故穰  
苴斬愛姬成盪寇之勲魏絳戮揚干顯臨戎之烈諸葛

亮斬馬設定庸蜀之士李光弼斬崔衆摧燕薊之師

闕

嚴刑方成大略臣請陛下申命元帥自禪

闕以

降有違犯命令者並以軍法從事其

闕

得鞍

馬財貨等悉以與之仍優加錫賚嚴刑以制

闕

重賞

以誘其心示金鼓進退之宜謹三令五申

闕

端拱三年春刑部尚書宋琪上疏曰中原所長秋夏霖  
靈天時也山川河津地利也槍突劔弩兵勝也財豐士

衆力彊也乘時互用較然可知王師破虜之計每秋冬  
時河朔軍州緣邊柵寨但專守境勿輒侵漁令彼尋戈  
其詞無措或戎馬既肥長驅入寇戎主親行胡羣萃至  
寒雲翳日朔雪迷空鞍馬相持種禍之利所宜守陴坐  
甲以逸待勞其騎士並屯於天雄軍貝磁相州以來若  
分於邊城緩急難於會合近邊州府只用步兵多屯弩  
手大者萬卒小者千人堅壁固守勿令出戰彼以全國  
戎羯此以一郡貔貅雖勇懦之有殊慮衆寡之不敌也



國家別命大將總統前軍以遏侵軼只在天雄軍那洺  
貝州以來設拑戎之備俟其陽春啓候戎虜計窮新草  
未生陳亥已朽蕃馬無力疲寇思歸逼而逐之必自奔  
北前軍行陣之法馬步精卒不過十萬自招討已下更  
命三五人藩侯克都監副戎排陣先鋒等臨事分布所  
貴有權追戎之陣須列前後其前陣萬五千騎陣身萬  
人是四十指揮左右廂各十指揮是二十將每指揮作  
一隊自軍主都虞侯指揮使押當每隊用馬突或刀子

槍一百條餘並弓劔骨錄其陣身解鎗排之候與戎人相搏之時無問薄厚十分作氣槍突交衝馳逐往來後陣更進虜若乘我深入陣身之後更以馬步人五千分為十頭以撞竿鎗弩俱進為回騎之舍也陣廂不可輕動蓋防橫騎奔衝此陣以都監領之進退賞罰便可裁決後陣以馬步軍八萬招討董之與前陣不得過三五里展廂實心布常山之勢左右排陣分押之或前陣擊破虜寇後陣亦禁其馳驟輕進蓋師正之律也牧誓云

四伐五伐乃止齊馬慎重之誠也

雍熙賜御書六韜

雍熙四年五月以北虜未服召北面諸將田重進潘美  
崔翰及殿前劉延翰對于便殿上訪以禦戎備邊之策  
延翰曰臣等皆鷹犬之才奉指蹤之命猶懼不給破虜  
之策惟聖心裁處上因手書六韜兵法將有五才十過  
之說以賜之又內出平戎陣圖指畫卷舒進退號令出  
沒以賜

至道邊防形勢圖

至道三年九月丙子

真宗

上因言西川叛卒事輔臣或

曰地無城池所以失其制禦上曰在德不在險初上命左藏庫使楊允恭等馳傳往西邊圖上山川形勝丙寅上御滋福殿召輔臣以圖示之歷指州縣堡壁謂曰朕已令屯兵內地且簡其閒冗轉餉當減省矣

景德禦寇圖錄

慶歷五年九月癸巳詔近臣考先朝正史實錄為景德

禦寇圖錄 寶訓中丞拱辰言乞詔近臣詳定景德禦寇圖上命采閱先朝史錄而考詳之

景德虎鈴經

閱

祥符兵要

祥符七年十一月癸未朔張質募軍旅更易之制三篇名曰兵要以進上稱善

祥符軍儀

祥符七年十二月辛未河西節度使石晉上軍儀條目  
三卷用將機宜要訣二圖詔獎之

天聖將帥要畧

天聖五年十二月二十二日秘書監胡旦上將帥要畧  
五十三卷

景祐神武秘畧

景祐四年六月戊子以御製神武秘畧賜河北河東陝  
西緣邊總管鈐轄知州軍每得代更相授之 仁宗景

祐中授古今行兵用師之要及諸家兵書纂為三十卷準漢志四種分門序曰禮記出征受成於學漢禮遣將尚書授以古兵書魏武帝命將行師皆以新書從事藝祖臨遣將勉其為治太宗嘗出軍誠以賜樞臣是用啓金鎖祕室之藏究鷓冠黃石之旨採古賢軍法及舊史成敗為十五卷三十篇其標目始於叙兵將才終於教射教弩實閫外之津梁幕中之龜鑑景祐四年六月以賜三路帥守 國家自景德中與契丹氏平而夏

人效職貢無事且四十年武備浸弛廟堂言不及兵及韓億任同知樞密院事乃建請執政舉堪任將帥者以備任使又言武臣宜知兵法權謀之書而今禁絕蓋類次四種之要使通習之上為親集神武秘略頒諸邊將

康定備邊要覽

見議邊類

丁度上十策名備邊要覽仁宗問禦邊之計度奏曰中國抗夷狄宜以智勝難以力克蓋地形武技與中國異



也今當謹亭障遠斥堠控扼要害為制禦萬全之計因  
上備邊十策

康定風角集占

康定元年十一月四日丙辰親製風角集占三卷鏤板  
印賜輔臣徧賜陝西都總管等 書目風角占一卷康  
定間司天臺奉詔集諸家候風之說前有御製序 後  
漢注風角謂候四方隅之風以占吉凶

康定兵說

關

康定論兵

康定元年正月趙元昊寇邊詔近臣陳攻守策同知樞密陳執中請修沿邊城池廣土兵減騎卒靜守以驕其志蓄銳以挫其鋒學士丁度條上十策名備邊要覽同修起居注吳育錄真宗朝通西域諸蕃并吳父祖本末上之殿中侍御文彥博言將權不可不專軍法不可不峻兵法曰畏我者不畏敵畏敵者不畏我使之畏我非

嚴刑何以濟乎古者什伍之長皆得專殺今統師之重乃不能誅一小校則軍中之令可謂隨矣議者以今寇非大敵師不深入將校有犯宜從中覆倘遇大敵則孰肯奮邪著作佐郎張方平上平戎十策大畧以為宜屯重兵河東示以形勢賊入寇必自延渭而興州巢穴之守必虛我師自麟府渡河不十日可至此所謂攻其所救形格勢禁之道也經畧夏竦議將在軍雖得自便然攻守大計當稟筭於朝廷乃畫攻守二策詔取攻策都

官員外郎景泰上邊臣要畧二十卷平戎策三卷十五  
篇學士王堯臣等上渭州推官魏庭堅所撰四夷龜鑑  
三十卷殿中丞王琥獻平戎方畧堯臣又上蔡旦所撰  
通志論十三篇備言攻守之策陝西畧判官田況上兵  
策十四事

康定行軍賞罰格

康定元年八月韓琦闕

康定聚米圖經

聚米圖經五卷康定間閣門通事舍人趙珣圖進西邊  
地形因授以兵寄

慶厯重修兵書

闕

慶厯三朝經武聖畧

王洙編十五卷 中興書目今止十卷 仁宗慶厯中  
命待制官集太祖太宗真宗料敵制勝之法而為此書  
始於議兵終於蕃夷凡十五卷慶厯五年二月庚戌御

邇英閣讀三朝經武聖略十一月癸未又讀乙未又御  
邇英閣讀之 書目寶元中王洙承詔撰 晁氏志經  
武聖略王洙撰寶元中西邊用兵朝廷講武備是時洙  
奉詔編祖宗任將用兵邊防事迹分二十門

慶歷兵錄

又見錄類

慶歷五年樞密副使丁度搜次首末鉤考纖微擬其攻  
守戰者為禁兵民兵兵錄五篇宋祁為序略曰宋興經  
武制衆凡軍有四一曰禁兵殿前馬步三司隸馬二曰

廂兵諸州隸馬三曰役兵羣有司隸馬四曰民兵農之  
健而材者籍之今參預丁公為兵錄合羣曹所分槌指  
諸條所隱彙而聯之部分班如也離而判之區處戢如  
也雖伍符猥并邊瑣曲折歲列廢置月比耗登披文指  
要坐帷而判蓋簡稽之決要蒐乘之總凡錄成乃上於  
官軍篇之首公各述其所由近衛別錄示有尊也餘軍  
弗載略所緩也文約事明成一王法

慶厯武經總要

書目武經總要四十卷天章閣待制曾公亮等承詔編  
定參政丁度總領之書成仁宗御製序冠篇首內制度  
十五卷邊防五卷故事十五卷占候五卷 慶厯三年  
十月乙卯命學士承旨丁度提舉修兵書亮為檢討前  
集校理曾公亮始於選將終於邊防後集始於伐謀終於遁  
甲四十卷三百十八門

慶厯臨機抵勝圖

見陣法



至和御製攻守衛圖

實錄至和元年三月壬申賜邊臣御製攻守禦衛圖

會要皇祐六年

即至和元年三月七日  
是年四月改元

樞密副使王堯臣

進兵策詔以聖製攻守衛圖為名送崇文院鏤板書

目三卷

嘉祐樞密院機要

嘉祐二年樞密使韓琦言國朝機要文字盡在密院歲久散逸盡朽多所不全請差官於諸房討尋編錄一本

進內一本留本院於是自建隆以來以歲月先後事類相從而纂集之其年八月乙巳樞密副使程戡提舉編修大理寺丞周革等點檢編排至六年十一月乙亥編成上之凡一千一百六十二冊 治平二年五月丙辰樞密院編機要文字九百八十一冊以進

嘉祐秘閣兵書

嘉祐六年四月丙子以大理寺丞郭固編校秘閣所藏兵書先是四館置官編校書籍而兵書與天文為秘書

獨不預大臣有言固曉知兵法乃命就秘閣編校抄成  
黃本一百七十二冊治平四年六月編畢

熙寧經武要畧

熙寧二年五月癸巳樞密院言本諸文書凡闕祖宗以  
來制所宜施於久遠者今欲刪取大旨著為一書及聖  
政釐革條章以次紀錄或有條理未備更該說使羣所  
冀當職者得以屢省其要以時考察則本兵大計網紀  
不廢其事目凡十曰兵制馬政邊防夷狄屬國城守器

械捕盜選才責效各以事類相從候編次成冊仍於逐門各留空紙以備書載將來措置事件從之仍賜名經武要畧三年十月丙戌以著作佐郎館閣校勘王存大理寺丞館閣校勘顧臨著作佐郎錢長卿大理寺丞劉奉世同編令都副丞旨管當至九年秋修畢上之

五年五月

癸未命內藏庫副使同編修

### 熙寧御製攻守圖

熙寧五年十二月己亥朔詔賜王韶攻守圖行軍環珠

武經總要神武秘畧風角集占四路戰守約東各一部  
仍令秦鳳路經畧司抄錄 七年九月丙午內出攻守  
圖二十五部賜河北

熙寧重校李靖兵法

熙寧三年

元豐校定兵法

元豐三年四月

皇朝軍政要覽

書目軍政備覽一卷皇朝都官員外郎曾公爽撰述天文地勢鄉兵為將奇正向背凡二十七篇

皇朝兵籌類要 李垂兵制書 建炎軍制二  
十一條 建炎纂集祖宗兵制 紹興玉壘忠  
書

見兵制

隆興武經通鑑

武經通鑑二十卷王彥上自始計至用間隆興二年五

月辛丑御製序乾道三年二月十六日賜將帥

乾道籌邊圖志

乾道三年十二月辛丑參政蔣芾上上曰所進籌邊策  
如指諸掌

嘉定中興經武要畧

寶祐七朝經武要畧

漢兵本末 徐天麟

南北籌邊 曾三英

百將傳十卷張預撰每傳必以孫子兵法斷之

渭南秘訣謝淵得之瀘州蓋八陣圖法也為之註

釋陰符元機朱安國註陰符經也蘇洵著權

書五篇心術法制攻守強弱用間又衡論十篇

漢刑法志善師者不陳善陳者不戰善戰者不敗

善敗者不亡舜善師而不陳者也湯武善陳不戰者

也齊桓善戰不敗者也楚昭王善敗不亡者也穀

梁傳出曰治兵習戰也入曰振旅習戰也兵事以嚴



終故曰善陣者不戰善戰者不死善死者不亡 淮  
南子易則用車險則用騎涉水則多弓隘則用弩晝  
則多旌夜則多火晦冥多鼓此為善設施也 孫子  
善用兵者如常山之蛇也擊其首則尾至擊其尾  
則首至擊其中則首尾俱至 荀子臨武君曰兵之  
所貴者勢利也所行者變詐也善用兵者感忽悠  
閑莫知所從出孫吳用之無敵於天下 淮南子  
飛鳥之鷙也總其首猛獸之攫也匿其爪虎豹不

外其牙噬犬不見其齒故用兵之道示之以柔而迎之以剛示之以弱而乘之以強為之以翕應之以張

七書形人而我無形此乃竒正之極 能因敵

變化以取勝謂之神五行無常勝四時無常位日

有短長月有死生 三畧軍井未達將不言渴軍

竈未炊將不言飢軍幕未辨將不言倦冬不服裘

夏不撰扇是謂禮也 管子鼓所以任也起也進

也金所以造也退也免也旂所以立兵也偃兵也

此所謂三官有三令而兵法治也 抱朴子良將

如收電可見不可追 通典孫子曰兵者國之大

事死生之地存亡之道不可不察故經之以五事

校之以計而索其情

謂下五事 彼我之情

一曰道德

化二曰天

惠三曰地

慈

四曰將

經

五曰法

制道者令民與上

覆三曰地 慈四曰將 經五曰法 制道者令民與上

下同意也故可與之死與之生而人不危天者陰陽

寒暑時制也地者遠近險易廣狹死生也凡用兵

之法全國為上破國次之

敵國來服為上 以兵擊破為次

全軍為上

破軍次之全卒為上破卒次之全伍為上破伍次之百

戰百勝非善之善者也不戰而屈人之兵善之善也

叙兵

收衆選擇立軍

孫子曰法者曲制官道主用也

曲制者部曲幡

今制論將搜才

幟金鼓之制也官者百官之分用也

道者糧路也主用者主軍費用也

軍政曰言不相聞

故為金鼓視不相見故為旌旗夫金鼓旌旗者所以一

人之耳目也人既專一則勇者不得獨進怯者不得獨

退紛紛紜紜鬪亂而不可亂渾渾沌沌形圓而不可敗

法制雜

教令

孫子曰用兵之道校之以計而索其情曰主孰

有道將孰有能天地孰得法令孰行兵衆孰強士卒孰  
練賞罰孰明吾以此知勝負矣夫料敵制勝計極險易  
利害遠近上將之道也策之而知得失之計候之而知  
動靜之理形之而知死生之地角之而知有餘不足之  
處知勝有五知可以戰與不可以戰者勝識衆寡之用  
者勝上下同欲者勝以虞待不虞者勝將能而君不御  
者勝此五者知勝之道

料敵制勝敵十五形帥十過察  
而後動險虛聲知無實敵降審

察用間有五有因間內間反間死間生間五間俱起莫

知其道是謂神紀因間者因其鄉人而用之者也內間者因其官人而用之者也反間者因其敵間而用之者也死間者為誑事於外令吾間知之而傳於敵間者也生間者反報者也故三軍之親莫親於間賞莫厚於間事莫密於間非聖智不能用間非仁義不能使間非微密不能得間之實凡軍之所欲擊城之所欲攻人之所欲殺必先知其守將左右謁者門者舍人之姓名令吾間必索知之敵人之間來間我者因以利道而舍之故

反間可得而用也。因是而知之，故因間內間可得而使也。因是而知之，故死間為誑事，可使告敵，因是而知之。

故生間可使如期，五間之事，主必知之，故反間不可不

厚也。

問謀

視卒如嬰兒，可與之赴深溪；視卒如愛子，可與

之俱死。

撫士

兵者詭道也，故能用示之，不能用近而示之。

遠遠而示之，近古之善用兵者，能使敵人前後不相及。

衆寡不相待，貴賤不相救，上下不相收，卒離而不集，兵

合而不齊，合於利而動，不合於利而止。

示弱

佯北勿從。

敵

戰形勢未衰便奔走而陣却者必有奇伏勿深入從之  
故太公曰夫出甲陣兵從卒亂所以多為變伴敗引  
之退取 銳卒勿攻強而避之少而逃之不若則能避之故

小敵之堅大敵之擒也無邀正正之旗無擊堂堂之陣  
此治變者也是故朝氣銳晝氣惰暮氣歸善用兵者避

其銳氣擊其惰歸此理氣者也

避銳

凡先處戰地而待敵

者佚後處戰地而趨戰者勞故善戰者致人而不致於  
人能使敵人自至者利之也以近待遠以逸待勞以飽  
待飢此治力者也

以逸待勞

凡戰者以正合以奇勝故善



出奇者無窮如天地不竭如江河終而復始日月是也

死而復生四時是也

兩軍相對  
取背破之

忿速可侮主不可以怒

而興師將不可以愠而致戰合於利而動不合於利而

止

批

凡處軍視生處高戰降無登此處山谷之軍也無

附於水而迎客視生處高無迎水流此處水上之軍也

絕斥澤惟亟去無留若交軍於斥澤之中必依水草而

背衆樹此處斥澤之軍也平陸處易而右背高前死後

生此處平陸之軍也

行軍下營  
審擇其地

好高而惡下貴陽而賤

陰養生而處實軍無百疾是為必勝

敵處高勿攻

安能動之

故我欲戰敵雖高壘深溝不得不與我戰者攻其所必

救也

攻其必救

夫兵之形象水水之形避高而趨下兵之形

避實而擊虛故水因地而制流兵因地而制勝兵無常

勢水無常形能因敵變化而取勝者謂之神進而不可

禦者衝其虛也

必攻其易

地形者兵之助故用兵有散地有

輕地有爭地有交地有衢地有重地有圯地有圓地有

死地散地吾將一其志輕地吾將使其屬爭地吾將趨

其後交地吾將固其結衝地吾將謹其市重地吾將繼  
其食地地吾將進其塗圍地吾將塞其闕死地吾將示  
之以不活

按地形  
知勝負

上兵伐謀其次伐交其次伐兵其下

攻城攻城之法為不得已修櫓轆輻具器械三月而後  
成距鬪又三月而後已將不勝其忿而蟻附之殺士卒  
三分之一而城不拔者此攻之災也故善用兵者屈人  
之兵而非戰拔人之城而非攻毀人之國而非久故兵  
不頓而利可全此謀攻之法也故用兵之法十則圍之

伍則攻之

固敵  
勿周

尚書厚齋王先生所稗玉海刊已七年而兵制未完者六卷欲求其成未能也既而臺諫奏之於朝命憲司檄所屬而訪求之其家無有也昔年君景陽從事浙東帥幕時抄以成帙帥聞乃令會府責成於郡庠遂俾鄧山書院山長王士貴同尚書之孫厚孫給筆札往錄之會部使者楊公按四明亟命予選諸生繕寫校讎侵版不閱月而畢嗚呼玉海之刊已七年于

茲而始克成書書之成否固係乎時然事機之來則其成亦易易耳他日是書之行於世信有資於博學非尋常類書比也因識其歲月云至正三年十月一

元路儒學教授天台朱文剛書

興路上虞縣儒學教諭陳子暈校正

玉海卷一百四十一